

編號 1 號

【旅行】林貴珠原作

這個時代每一儕人都有旅行个經驗，對有兜人來講旅行單純就係放鬆心情，也有人認為旅行做得同壓力放忒佢；對來講，旅行係人生最有價值个投資，想愛去看落泥以外个世界。人無旅行過，毋知世界有幾大；無冒過險，毋知好痛惜自家个生命。旅行同人生共樣，你會緊堵著生份人，對生份到熟事，再對熟識轉到生份。你係去到外國，同無共樣國家个人相識過後，你會發現著：原來兜兜生活个空間恁細，外背个世界還有恁多毋識聽過、毋識見過个人同事物！正會感想著，原來人生乜做得恁樣過！想一哪仔去旅行，增廣見聞、寫出無共樣个人生劇本¹。

緊想等愛去蹶一座高山，就同老公參詳，決定在日本換新年號个時節去蹶三千七百六十六公尺高个高山。六點天矇光仔，全世界想愛熟事佢个人，在山神廟前祈求一路平安、順序，做登山个準備：買食个人、翕相个人，濟濟楚楚²、鬧熱煎煎仔。涼涼个山風，柔柔仔吹過每一儕人个面頰卵，歡迎大家來到這位遠寮。大家用快樂个腳步蹶到半山排，山仔也脫忒青溜溜个身裝，換一身豬肝色个火山石禮服來迎接大家。下晝四點，兜就蹶到

三千兩百公尺高來也，在翕熱个七月天，山頂个溫度係零下兩度定定，大家就先入到山屋休息。

半夜十一點半大家過出發，去蹶最尾一截山路，星仔同月光來做伴，牽等你、你揪等，大家互相扶持蹶上日本最高个高山，該時節，大家早就汗流脈絡。企在山頂看往下³，山風颼颼滾⁴，彎彎幹幹个上山路，變做一條金若若仔⁵个龍，纏等山崗鑽入雲海。臨天光邊仔，大家耐等⁶冷風，等等日頭洩出雲海。一下仔時間，日光就同大地照到光光光，晟眼到人个目珠強強會擘毋開。日頭著等啾紅个禮服同大家攞手講恁早，每一儕人都感動到目汁同汗水分毋清楚，這係這一生人看著最闊、最遠、最錫人个景緻！大家在火山口迂一輪⁷過後，就滿足个下山，完成咧這擺艱難个挑戰。

旅行个重點毋係愛去幾多地方、看過幾多風景，係旅行轉來過後，自家有麼个改變？有兜个風景，你係無企在高高个地方來看，毋知佢哪錫人；有兜个路，你係無去行過，無法度感受著佢个靚。每一擺个旅行都有厥个意義，對來講，係透過旅行尋著真實个自家；旅行分吾个生活改變盡多，無論係對旅行个看法，或者係對人生个態度，旅行係一種拂毋忒个甜蜜回憶，盡錫人尋味。

³ 看往下：音 kon gong' ha'；向下看。

⁴ 颼颼滾：音 xiu xiu gun'；風吹過的聲音。

⁵ 金若若仔：音 gim' na na e'；閃亮如金。

⁶ 耐等；音 ngai den'；忍受著。

⁷ 迂一輪：音 din' id' lin'；遠一圈。

¹ 劇本：音 kias' bun'；劇本。

² 濟濟楚楚：音 ji ji jio jio；人多、來回走動貌。

編號 2 號

【板圓情，爺哀心】徐熏嫻原作

人生，總會有一種味緒恬恬仔固在心肝窟陪等過日仔……。

從細就歇在白石下个山崐背，茅屋、泥壁分屋下人遮風抵雨過生活，戶檻¹、籬笆掌等無愁無慮个童年，這種家境係記憶中最靚个一扇景色。

該係民國五、六十年臺灣民生經濟正起步个年代，爺哀連連續續降七、八個細人仔，在恁艱辛个環境愛同子女牽成到大，實在無恁該！還記得，見擺食飯阿姆就會講：「細人仔有麼个食麼个，番薯籤準飯划，天生天養乖乖大。」又講：「飯糝划²淨莫打爽，座粗無座爽。」這兜話從細聽到大，毋單止聽入耳還聽入心，一路里來養成痛惜食物个好習慣。

家境貧困个日仔，閒時閒節細人仔哪有零星錢買零嗒來食！恁起來，盡望就望過年過節打板仔个時節，目勾勾仔望等阿姆去米店糴³糯米轉來、目金金仔看等阿姆浸米、眼晶晶仔看等一圈

又一圈白鮮鮮个米漿對磨石背流入板袋肚，看到脰有脰仔⁴——口涎水緊吞，就緊問阿姆：「還愛幾久正做得个板仔吓⁵？」佢總係笑笑仔應：「惹嫻！細人仔有耳無嘴，恬恬看！」惹嫻个就恬恬看阿姆拿紅索仔，摺裝好米漿个板袋放在長凳板綳纏、砵界燥，等過半晝邊仔，阿爸就會同細人仔喊兼來一手个板仔，佢一手、一手，毋使幾久，板仔就个好咗！再你一粒、一粒，一下工一毛蘭就裝湊大粒細粒个板圓。還記得逐擺按板圓，阿姆就會講：「惡手毋當兩⁶！」該央時毋知頭天个，總係會跔嘴尾唸，噯毋知這句話蘊含麼个人生个道理，等到自家成家立業後，正知得這句話原來固等一種味緒。這種味緒有爺哀教「按板圓」个人生味！

認為板圓愛好食毋單淨愛真材實料、鹹淡愛堵好，盡要緊个係共心个溫情，用手工按出來个板圓特別有味緒、特別錫人食！想來，人生，就像板圓共樣，愛磨、愛砵、愛个、愛按、愛有鹹淡，正有味緒！逐粒板圓裡肚就會固等每儕人佢最寶貴、最值得珍藏个溫情，肯磨、肯按，煞猛打拚總會換來自家盡好个人生，不管係鹹、還係淡，在在就係「圓滿」。

¹ 戶檻：音 fu^ˇ kiam^ˊ；門檻。

² 划：音 pa^ˇ；把食物撥進嘴裡。

³ 糴：音 tag；買入穀物。

⁴ 脰有脰仔：音 goi^ˊ iog^ˋ iog^ˋ e^ˇ；渴望吃東西的樣子。

⁵ 吓：音 ha^ˇ；表疑問語氣。

⁶ 惡手毋當兩：音 og^ˋ su^ˋ m^ˇ dong liong^ˋ；再厲害的人也比不上眾人的力量。

編號 3 號

【搞頭王】曾秋梅原作

放棄日，天矇光仔，細人仔就會分大人喊䟽床，去田坵仔手割田菁草、掌牛仔，無人敢搵在眠床。無細人仔搞个禾埕，恬靜到連狗仔乜懶拐拐仔，搵在花樹頭下啄咕¹。毋過當晝一過，歸禾埕仔都係細人仔在該搞，唸唸喊喊，吵到屋頂都會掀忒。

阿正係有名个搞頭王，當晝頭老人家愛睡當晝，佢就偏偏愛同一大陣半大細仔个細人伴仔在禾埕頂搞球仔，你攞過來、擲過去搞到當暢樂。球仔係無生著目珠擲到叔婆厝屋下，該就艱辛哩！叔婆斯係惡到有名个，阿正天毋驚地不怕，就淨驚叔婆定定。有一擺，佢躡等腳尾²入去尋球仔，無想著叔婆拝等球仔、齧牙齧齒³大聲罵：「你這兜細強仔攏死人，分人睡一下當晝都毋得，球仔破忒去，看你兜愛搞麼个！」阿正嚇到面呷青，瀉一路出，企在屋簷下，嚶嚶啣啣闕到腳緊蹬。

臨暗頭，阿正就湊大家在禾埕搞園人尋。伙房屋像老鼠窿，兜細人仔舂上園下，驚分人尋著連糞缸乜走入去園。阿正膽識

盡大，跳入豬欄裡背園，無細義嘎踪著豬子，豬子痛到吱吱滾⁴，阿正嚇到飆出來，好死毋死徑著豬籠嘎橫著，額頭推著豬欄起一隻癭，分厝爸打到喊毋敢。

熱天个時節，莊下个細人仔盡好去河壩搞水，搞啊搞欸，毋使使錢就學會泅水仔吔。西北橋下个河壩水係三合水⁵，三合水會合个地方就會形成波螺皺，係對崑頂看啊下盡得人驚哦！

有一日，阿正又湊等大家去河壩洗身仔，該央時，細人仔去河壩搞水大家都同衫褲脫淨淨在河壩跳上跌落，無麼个好見笑个。大家搞到當興頭个時節，阿正對橋頂煞力牯飆啊下，唉哉！「四溝水⁶人蹬牛屎——的準⁷」，嘎飆落波螺皺裡肚毋見忒！共陣个細人仔驚到大聲喊：「救命啊！有人沉忒吔！」好得阿正个命恁靚，該時節堵好有一個在河壩脣掌牛个後生阿哥，佢聽啊著有人喊救命，牛索一放，煞煞飆入水肚，同分波螺皺啍入去个阿正救起來。

人講：「大難不死，必有後福」，搞頭王阿正出社會了後，正式在臺北做頭路賺盡多錢，對莊項个修橋鋪路出錢盡大方。還過對救厥命个恩情人，過年過節定著會大擺細擺去厝屋下答謝，無一年識跌忒過。

¹ 啄咕：音 dug` gu`；打瞌睡時頻頻點頭貌。

² 躡等腳尾：音 ne den` giog` mi`；抬起腳跟而靠腳尖著地著。

³ 齧牙齧齒：音 ngad nga` sen cii`；咬牙切齒、凶惡的樣子。

⁴ 吱吱滾：音 gi gi gun`；狀聲詞，痛的叫聲。

⁵ 三合水：音 sam` gab` sui`；三方水流交會的河水。

⁶ 四溝水：音 xi gieu` sui`；屏東萬巒地名。

⁷ 的準：音 dag zun`；非常準確、精準。